

## **2012 թվականի հունվար-մայիս ամիսներին ՀՀ պետական բյուջեի կատարման ամփոփ բնութագիրը<sup>1</sup>**

2012 թվականի հունվար-մայիս ամիսներին ՀՀ պետական բյուջեի եկամուտները կազմել են 341.8 մլրդ դրամ, իսկ ծախսերը՝ շուրջ 348 մլրդ դրամ, որոնք համապատասխանաբար 82.4%-ով և 74.8%-ով ապահովել են ՀՀ կառավարության առաջին կիսամյակի ծրագրի կատարումը: Հարկ է նշել, որ չնայած բյուջետային ծախսերի արձանագրված կատարողականին՝ ապահովվել է պետական բյուջեի ծախսային ծրագրերի շրջանակներում պետական մարմինների կողմից սահմանված կարգով ստանձնած պարտավորությունների ամբողջական կատարումը: «Հայաստանի Հանրապետության 2012 թվականի պետական բյուջեի մասին» ՀՀ օրենքի 9-րդ հոդվածի 11-րդ կետի և 11-րդ հոդվածի 3-րդ կետի պահանջներից ելնելով՝ պետության դրամական միջոցների համախմբված հաշվառման նպատակով պետական բյուջեի ծրագրային և փաստացի ցուցանիշներում ներառվել են նաև ՀՀ պետական հիմնարկների համար բացված արտաբյուջետային հաշիվների համապատասխան շրջանառությունը, ինչպես նաև առանց սահմանափակման պետական բյուջեից կատարվող վճարումները: Մասնավորապես՝ արտաբյուջետային եկամուտները կազմել են 8.7 մլրդ դրամ կամ առաջին կիսամյակում նախատեսված մուտքերի 72.4%-ը, իսկ ծախսերը՝ 5.5 մլրդ դրամ կամ կիսամյակային ծրագրի 39.1%-ը: Առանց արտաբյուջետային միջոցների պետական բյուջեի եկամուտները կազմել են շուրջ 333.1 մլրդ դրամ, իսկ ծախսերը՝ 342.5 մլրդ դրամ՝ ապահովվելով առաջին կիսամյակի համապատասխանաբար 82.7% և 75.9% կատարողական: Պետական բյուջեի տարեկան ծրագրային ցուցանիշները կատարվել են եկամուտների գծով՝ 36.8%-ով, ծախսերի գծով՝ 35.7%-ով:

### ՀՀ պետական բյուջեի եկամուտները

Նախորդ տարվա նույն ժամանակահատվածի համեմատ պետական բյուջեի եկամուտներն աճել են 4.9%-ով կամ 16.1 մլրդ դրամով, որը հիմնականում ապահովվել է հարկային եկամուտների աճի հաշվին:

---

<sup>1</sup> Պետական բյուջեի եկամուտներում, ծախսերում և պակասորդի ֆինանսավորման աղբյուրներում ներառված չեն արտաքին աղբյուրներից ֆինանսավորվող նպատակային ծրագրեր իրականացնող գրասենյակներով շրջանառվող միջոցները:

Պետական բյուջեի եկամուտների 94.7%-ը ձևավորվել է հարկային եկամուտների, պետական տուրքերի և պարտադիր սոցիալական ապահովության վճարների, 4.9%-ը՝ այլ եկամուտների, 0.4%-ը՝ պաշտոնական դրամաշնորհների հաշվին:

2012 թվականի հունվար-մայիս ամիսներին ՀՀ պետական բյուջե են մուտքագրվել ավելի քան 323.5 մլրդ դրամ հարկային եկամուտներ, պետական տուրքեր և պարտադիր սոցիալական ապահովության վճարներ, որոնք կազմել են կիսամյակային ծրագրի 82.4%-ը: 2011 թվականի նույն ժամանակահատվածի համեմատ նշված եկամուտներն աճել են 4.6%-ով կամ 14.3 մլրդ դրամով, ինչը հիմնականում պայմանավորված է շահութահարկի, բնապահպանական ու բնօգտագործման վճարների, եկամտահարկի, ավելացված արժեքի հարկի և ակցիզային հարկի գծով ստացված մուտքերի աճով:

2012 թվականի հունվար-մայիս ամիսներին պետական բյուջեի հարկային եկամուտներն ու տուրքերը կազմել են 272.8 մլրդ դրամ, որի 47%-ն ապահովվել է ավելացված արժեքի հարկի հաշվին: Այն կազմել է շուրջ 128.2 մլրդ դրամ և 2.7%-ով կամ 3.4 մլն դրամով գերազանցել նախորդ տարվա նույն ցուցանիշը: ԱԱՀ-ի մուտքերից 74.3 մլրդ դրամը ստացվել է ՀՀ սահմանին հարկումից, 53.9 մլրդ դրամը՝ ներքին շրջանառությունից: Հարկ է նշել, որ ԱԱՀ-ի մուտքերի աճն ապահովվել է ներքին շրջանառության հաշվին, որի գծով մուտքերն աճել են 16.9%-ով, մինչդեռ ներմուծումից ստացված եկամուտների գծով արձանագրվել է 5.6%-ով անկում:

Պետական բյուջեի հարկային եկամուտների ու պետական տուրքերի 6.2%-ն ապահովվել է ակցիզային հարկի հաշվին՝ կազմելով ավելի քան 16.8 մլրդ դրամ: Մասնավորապես՝ հանրապետություն ներմուծվող ենթաակցիզային ապրանքների հարկումից ստացվել է 10.5 մլրդ դրամ, հանրապետությունում արտադրվող ենթաակցիզային ապրանքների հարկումից՝ 6.4 մլրդ դրամ: Ընդ որում, տեղական արտադրության ենթաակցիզային ապրանքների հարկումից ստացված մուտքերը նախորդ տարվա նույն ժամանակահատվածի համեմատ ավելացել են 33.5%-ով, իսկ ներմուծվող ապրանքների գծով մուտքերը՝ 6.4%-ով. արդյունքում ակցիզային հարկի ընդհանուր մուտքերն աճել են 15.2%-ով:

Հաշվետու ժամանակահատվածում ՀՀ պետական բյուջեի հարկային եկամուտների 18.7%-ը ձևավորվել է շահութահարկի հաշվին՝ կազմելով 51 մլրդ դրամ: Նախորդ տարվա

հունվար-մայիս ամիսների համեմատ շահութահարկի մուտքերն աճել են 12.6%-ով կամ 5.7 մլրդ դրամով:

2012 թվականի հունվար-մայիս ամիսներին ՀՀ պետական բյուջե է մուտքագրվել շուրջ 34.8 մլրդ դրամ եկամտահարկ՝ ապահովելով հարկերի և տուրքերի 12.7%-ը և 11.7%-ով գերազանցելով նախորդ տարվա նույն ցուցանիշը:

Մաքսատուրքի գծով մուտքերը կազմել են 13.5 մլրդ դրամ կամ հարկերի և տուրքերի 5%-ը և 3.6%-ով զիջել 2011 թվականի համապատասխան ցուցանիշը:

2012 թվականի հունվար-մայիս ամիսներին պետական բյուջե են մուտքագրվել շուրջ 8.7 մլրդ դրամ պետական տուրքեր՝ կազմելով առաջին կիսամյակի ծրագրի 89.5%-ը: Նախորդ տարվա նույն ժամանակահատվածի համեմատ նշված մուտքերն աճել են 12.9%-ով:

Հաշվետու ժամանակահատվածում գործունեության առանձին տեսակներից գանձվել են 7.2 մլրդ դրամ հաստատագրված վճարներ՝ ապահովելով հարկային եկամուտների ու պետական տուրքերի 2.6%-ը: Նշված մուտքերը նախորդ տարվա նույն ժամանակահատվածի համեմատ նվազել են 13.4%-ով՝ պայմանավորված հաստատագրված վճարներով հարկվող գործունեության մի շարք տեսակներ հարկման ընդհանուր դաշտ անցնելու հանգամանքով:

2012 թվականի հունվար-մայիս ամիսների ընթացքում ՀՀ պետական բյուջե են մուտքագրվել 8.6 մլրդ դրամ բնօգտագործման և բնապահպանական վճարներ՝ կազմելով հարկերի և տուրքերի 3.2%-ը: Նախորդ տարվա նույն ժամանակահատվածի համեմատ նշված եկամուտներն աճել են 77.4%-ով՝ հիմնականում պայմանավորված «Բնապահպանական և բնօգտագործման վճարների մասին» ՀՀ օրենքում կատարված փոփոխությամբ, որի համաձայն արդյունահանված մետաղական օգտակար հանածոների և դրանց վերամշակման արդյունքում ստացված արտադրանքի իրացման համար սահմանվել է ռոյալթի, որի գծով հաշվետու ժամանակահատվածում ՀՀ պետական բյուջե է մուտքագրվել շուրջ 4.9 մլրդ դրամ:

Հաշվետու ժամանակահատվածում ՀՀ պետական բյուջե են մուտքագրվել 3.9 մլրդ դրամի այլ հարկեր՝ կազմելով հարկերի և տուրքերի 1.4%-ը: Մասնավորապես՝ 1.7 մլրդ դրամ են կազմել արտոնագրային վճարները, 733.4 մլն դրամ՝ ճանապարհային վճարները, 328.2 մլն դրամ՝ «Կոնցեսիայի մասին» ՀՀ օրենքով սահմանված կոնցեսիոն վճարը, 210.3 մլն

դրամ՝ հարկային օրենսդրության խախտման համար «Հարկերի մասին» ՀՀ օրենքով սահմանված տուգանքները, 210 մլն դրամ՝ «Կոնցեսիայի մասին» ՀՀ օրենքով սահմանված ռոյալթին, 177.3 մլն դրամ՝ հանրային ծառայությունների կարգավորման պարտադիր վճարները, շուրջ 8.7 մլն դրամ՝ ռադիոհաճախականության օգտագործման թույլտվության տրամադրման (գործողության ժամկետի երկարաձգման) վճարները և 541.5 մլն դրամ՝ ՀՀ կառավարությանն առընթեր պետական եկամուտների կոմիտեի նյութական խրախուսման ֆոնդի եկամուտները: Նախորդ տարվա նույն ժամանակահատվածի համեմատ այլ հարկերի փաստացի ցուցանիշը նվազել է 49.9%-ով կամ 3.9 մլրդ դրամով, ինչը հիմնականում պայմանավորված է ռոյալթիի և ռադիոհաճախականության օգտագործման թույլտվության տրամադրման վճարների նվազմամբ:

Պարտադիր սոցիալական ապահովության վճարների գծով 2012 թվականի հունվար-մայիս ամիսների եկամուտները կազմել են շուրջ 50.7 մլրդ դրամ: 2011 թվականի նույն ժամանակահատվածի համեմատ այն գրեթե չի փոփոխվել:

2012 թվականի հունվար-մայիս ամիսների ընթացքում արտաքին աղբյուրներից ստացվել են 1.5 մլրդ դրամ պաշտոնական դրամաշնորհներ՝ կազմելով առաջին կիսամյակի ծրագրով նախատեսված ցուցանիշի 75.4%-ը: Մասնավորապես՝ 912.1 մլն դրամ է ստացվել պետական հիմնարկների արտաբյուջետային ծրագրերի շրջանակներում՝ կազմելով կիսամյակի ծրագրով նախատեսվածի 64.6%-ը: Հաշվետու ժամանակահատվածում ևս 615.9 մլն դրամ է ստացվել ՀՀ տավարաբուծության զարգացման ծրագրի շրջանակներում՝ տոհմային երինջների ձեռքբերման նպատակով:

2012 թվականի հունվար-մայիս ժամանակահատվածում ՀՀ պետական բյուջեի այլ եկամուտները կազմել են շուրջ 16.8 մլրդ դրամ՝ 83.8%-ով ապահովելով կիսամյակային ծրագրային ցուցանիշը: Նշված գումարից շուրջ 7.3 մլրդ դրամը կազմել են ՀՀ պետական հիմնարկների արտաբյուջետային եկամուտները, որոնց ծրագիրը կատարվել է 73.7%-ով: Այլ եկամուտների կազմում կիսամյակային ծրագրի գերազանցում է արձանագրվել բանկերում և այլ ֆինանսավարկային հաստատություններում բյուջեի ժամանակավոր ազատ միջոցների տեղաբաշխումից և դեպոզիտներից ստացվող տոկոսավճարների, ՀՀ կառավարությանն առընթեր անշարժ գույքի կադաստրի պետական կոմիտեի ծախսերի նկատմամբ եկամուտների գերազանցումից մուտքերի և տիրազուրկ, ժառանգության իրավունքով, ինչպես նաև ֆիզիկական և իրավաբանական անձանցից (բացառությամբ ՀՀ համայնքների,

միջազգային կազմակերպությունների, օտարերկրյա պետությունների) նվիրատվության կարգով պետությանը որպես սեփականություն անցած դրամական միջոցներից մուտքերի գծով, որոնք կիսամյակային ծրագրային ցուցանիշները գերազանցել են համապատասխանաբար 192.6, 69.2 և 37.8 տոկոսով՝ կազմելով 1.9 մլրդ դրամ, 297.7 մլն դրամ և 77.2 մլն դրամ:

Իրավաբանական անձանց կապիտալում կատարված ներդրումներից ստացվող շահաբաժինների գծով մուտքագրվել է 11.6 մլն դրամ՝ կազմելով առաջին կիսամյակում նախատեսվածի 4.8%-ը: Նախորդ տարվա նույն ժամանակահատվածի համեմատ նշված մուտքերը նվազել են 74.7%-ով կամ 34.3 մլն դրամով:

Պետության կողմից տրված վարկերի դիմաց ստացվել են ավելի քան 1.2 մլրդ դրամ տոկոսավճարներ՝ 46.6%-ով ապահովվելով կիսամյակային ծրագրային ցուցանիշը: Նախորդ տարվա նույն ժամանակահատվածի համեմատ նշված մուտքերի աճը կազմել է 29% կամ 279.7 մլն դրամ:

Ավելի քան 356.2 մլն դրամ է մուտքագրվել պետական սեփականություն հանդիսացող գույքի վարձակալությունից՝ 97.8%-ով ապահովվելով առաջին կիսամյակում ծրագրված ցուցանիշը և 0.8%-ով գերազանցելով 2011 թվականի նույն ժամանակահատվածի ցուցանիշը:

Հաշվետու ժամանակահատվածում իրավախախտումների համար կիրառվող պատժամիջոցներից պետական բյուջե է մուտքագրվել շուրջ 2.3 մլրդ դրամ՝ 66.8%-ով ապահովվելով առաջին կիսամյակի ծրագրված ցուցանիշը: Նախորդ տարվա նույն ժամանակահատվածի համեմատ նշված մուտքերը նվազել են 1%-ով կամ 23.8 մլն դրամով:

Ավելի քան 10.5 մլրդ դրամ է մուտքագրվել օրենքով և այլ իրավական ակտերով սահմանված պետական բյուջե մուտքագրվող այլ եկամուտների գծով՝ կազմելով առաջին կիսամյակի ծրագրով նախատեսվածի 85.4%-ը: Նախորդ տարվա նույն ժամանակահատվածի համեմատ նշված մուտքերի աճը կազմել է 10% կամ 955.9 մլն դրամ:

2011 թվականի նույն ժամանակահատվածի համեմատ այլ եկամուտներն աճել են 3.3%-ով, ինչը հիմնականում պայմանավորված է ռեզիդենտներին տրամադրված վարկերի օգտագործման տոկոսավճարների, օրենքով և այլ իրավական ակտերով սահմանված պետական բյուջե մուտքագրվող այլ եկամուտների ու տիրազուրկ, ժառանգության իրավունքով, ինչպես նաև ֆիզիկական և իրավաբանական անձանցից (բացառությամբ ՀՀ

համայնքների, միջազգային կազմակերպությունների, օտարերկրյա պետությունների) նվիրատվության կարգով պետությանը որպես սեփականություն անցած դրամական միջոցներից մուտքերի աճով:

### ՀՀ պետական բյուջեի ծախսերը

2012 թվականի հունվար-մայիս ամիսներին պետական բյուջեից կատարված ծախսերը նախորդ տարվա նույն ժամանակահատվածի համեմատ աճել են 4.7%-ով կամ 15.6 մլրդ դրամով: Ընդ որում, աճ է արձանագրվել ընթացիկ ծախսերի գծով, իսկ ոչ ֆինանսական ակտիվների հետ գործառնությունների գծով գրանցվել է 30.8%-ով անկում:

Ընթացիկ ծախսերը հաշվետու ժամանակահատվածում կազմել են 328.4 մլրդ դրամ՝ 76.2%-ով ապահովելով կիսամյակային ծրագրի կատարումը: Նախորդ տարվա նույն ժամանակահատվածի համեմատ ընթացիկ ծախսերն աճել են 8%-ով կամ 24.3 մլրդ դրամով: Ընթացիկ ծախսերից 28.4 մլրդ դրամ տրամադրվել է պետական հիմնարկների աշխատողների աշխատանքի վարձատրությանը, որը կազմել է կիսամյակային ծրագրի 77.2%-ը և 0.2%-ով գերազանցել նախորդ տարվա հունվար-մայիսի ցուցանիշը: 1.9 մլրդ դրամ տրամադրվել է պարտադիր սոցիալական ապահովության վճարներին՝ 73.6%-ով ապահովելով կիսամյակային ծրագրի կատարումը: Ծառայությունների և ապրանքների ձեռքբերման նպատակով պետական բյուջեից օգտագործվել է 73.5 մլրդ դրամ, որը կազմել է կիսամյակային ծրագրի 76.1%-ը և 25.9%-ով գերազանցել նախորդ տարվա համապատասխան ցուցանիշը: Հաշվետու ժամանակահատվածում 15.1 մլրդ դրամ տրամադրվել է պետական պարտքի սպասարկմանը՝ կազմելով կիսամյակային ծրագրի 66.8%-ը: Մասնավորապես՝ նշված գումարից 11.6 մլրդ դրամը տրամադրվել է ներքին, 3.5 մլրդ դրամը՝ արտաքին պարտքի սպասարկմանը: Պետական պարտքի սպասարկման ծախսերը 15%-ով գերազանցել են նախորդ տարվա նույն ցուցանիշը՝ հիմնականում պայմանավորված ներքին պետական պարտքի սպասարկման ծախսերի աճով:

Անցած ժամանակահատվածում ՀՀ պետական բյուջեից տրամադրվել են 8.5 մլրդ դրամի սուբսիդիաներ՝ կազմելով կիսամյակային ծրագրի 81.1%-ը և 19.8%-ով գերազանցելով նախորդ տարվա ցուցանիշը:

39.3 մլրդ դրամ են կազմել պետական բյուջեից տրամադրված դրամաշնորհները, որից 38.6 մլրդ դրամը տրամադրվել է պետական հատվածի այլ մակարդակներին, 631.2 մլն

դրամը՝ միջազգային կազմակերպություններին: Մասնավորապես՝ համայնքների բյուջեներին տրամադրվել են 13.5 մլրդ դրամի դոտացիաներ, որոնք նախորդ տարվա նույն ժամանակահատվածի համեմատ գրեթե չեն փոփոխվել: Դրամաշնորհների կիսամյակային ծրագիրն ընդհանուր առմամբ կատարվել է 80.4%-ով, իսկ նախորդ տարվա հունվար-մայիս ամիսների համեմատ նշված ծախսերն աճել են 8.2%-ով:

Ընթացիկ ծախսերի 35.4%-ը՝ 116.1 մլրդ դրամ, ուղղվել է սոցիալական նպաստների և կենսաթոշակների վճարմանը՝ ապահովելով ներկայացված բոլոր պարտավորությունների կատարումը և արձանագրելով առաջին կիսամյակի ծրագրի 77.5% կատարողական: Մասնավորապես՝ նշված գումարից 81.4 մլրդ դրամ են կազմել կենսաթոշակները, 32.1 մլրդ դրամ՝ նպաստները, 2.6 մլրդ դրամ տրամադրվել է սոցիալական ապահովության միջոցառումների իրականացման նպատակով աշխատողներին առաջարկվող սոցիալական փաթեթի ծառայությունների շրջանակներում, որից 2.2 մլրդ դրամն օգտագործվել է բժշկական ապահովագրության նպատակով: Նախորդ տարվա նույն ժամանակահատվածի համեմատ նպաստների և կենսաթոշակների ծախսերն ավելացել են 9.4%-ով կամ 10 մլրդ դրամով:

Հաշվետու ժամանակահատվածում պետական բյուջեի միջոցներից 45.5 մլրդ դրամ տրամադրվել է այլ ծախսերին՝ կազմելով կիսամյակային ծրագրի 72.3%-ը և 13.6%-ով զիջելով նախորդ տարվա նույն ցուցանիշը:

Պետական բյուջեի ոչ ֆինանսական ակտիվների հետ գործառնությունները հունվար-մայիս ամիսներին կազմել են 19.6 մլրդ դրամ կամ կիսամյակային ծրագրի 56.9%-ը: Մասնավորապես՝ 19.7 մլրդ դրամ են կազմել ոչ ֆինանսական ակտիվների գծով ծախսերը, որոնց կիսամյակային ծրագիրը կատարվել է 55.9%-ով: 141.4 մլն դրամ է մուտքագրվել ոչ ֆինանսական ակտիվների օտարումից՝ կազմելով կիսամյակային ծրագրի 16%-ը: Նախորդ տարվա նույն ժամանակահատվածի համեմատ ոչ ֆինանսական ակտիվների հետ գործառնությունների ցուցանիշը նվազել է 30.8%-ով՝ հիմնականում պայմանավորված շենքերի և շինությունների վրա կատարված ծախսերի նվազմամբ:

#### ՀՀ պետական բյուջեի պակասուրդը

2012 թվականի հունվար-մայիս ամիսներին ՀՀ պետական բյուջեն կատարվել է շուրջ 6.2 մլրդ դրամ պակասուրդով՝ կիսամյակային ծրագրով նախատեսված 50.7 մլրդ դրամի

դիմաց: Մասնավորապես՝ պակասուրդի ներքին ֆինանսավորումը կազմել է -22.9 մլրդ դրամ, արտաքին ֆինանսավորումը՝ 29.0 մլրդ դրամ: Պակասուրդի ցածր ցուցանիշը հիմնականում պայմանավորված է ծախսերի համեմատաբար ցածր կատարողականով: Վերջինիս, ինչպես նաև արտաքին աղբյուրներից նախատեսվածից 30.2 մլրդ դրամով ավելի վարկային միջոցների ստացման արդյունքում ֆինանսավորման ներքին աղբյուրներում նախատեսված բյուջեի ազատ միջոցներից կիսամյակային ծրագրով նախատեսված 58.6 մլրդ դրամ օգտագործման դիմաց նշված միջոցներն ավելացել են 21.1 մլրդ դրամով:

Ներքին աղբյուրներում -3.2 մլրդ դրամ են կազմել փոխառու զուտ միջոցները, -19.7 մլրդ դրամ՝ ֆինանսական զուտ ակտիվները: Մասնավորապես՝ -2.4 մլրդ դրամ է կազմել գանձապետական պարտատոմսերի գծով զուտ ֆինանսավորումը: Մուրհակների մարման նպատակով օգտագործվել է 37.7 մլն դրամ: Հաշվետու ժամանակահատվածում ՀՀ ռեզիդենտներին պետական բյուջեից տրամադրվել են 848.4 մլն դրամի վարկեր կամ առաջին կիսամյակի ծրագրով նախատեսված ծավալի 63.5%-ը: Շուրջ 2.3 մլրդ դրամ ստացվել է տրամադրված ներքին վարկերի վերադարձից, որը 47.8%-ով գերազանցել է առաջին կիսամյակի ծրագրային ցուցանիշը՝ պայմանավորված ՌԴ վարկի հաշվին տրամադրված վարկերի վերադարձով, որը ծրագրով նախատեսված չէ:

Անցած ժամանակահատվածում պետական բյուջեի պակասուրդի արտաքին ֆինանսավորումը կազմել է 29.0 մլրդ դրամ, որից 46.9 մլրդ դրամը՝ փոխառու զուտ միջոցների, -17.8 մլրդ դրամը՝ ֆինանսական զուտ ակտիվների գծով: Եվրահանձնաժողովի կողմից Մակրոֆինանսական աջակցության ծրագրի շրջանակներում հաշվետու ժամանակահատվածում տրամադրվել են 20.1 մլրդ դրամի վարկային միջոցներ, իսկ Համաշխարհային բանկի հետ Զարգացման քաղաքականության երրորդ ծրագրի շուրջ գործող համաձայնագրի շրջանակներում՝ 30.3 մլրդ դրամի վարկային միջոցներ: Շուրջ 3.5 մլրդ դրամ ուղղվել է արտաքին պարտավորությունների մարմանը, որից 2.0 մլրդ դրամ հատկացվել է Համաշխարհային բանկի աջակցությամբ իրականացվող ծրագրերի գծով պարտքի մարմանը, 169.5 մլն դրամ՝ ԳԶՄՀ, 137.4 մլն դրամ՝ ՎԶԵԲ-ի, 189.5 մլն դրամ՝ ՕՊԵԿ-ի միջազգային զարգացման հիմնադրամի նկատմամբ ունեցած պարտքի մարմանը, 436.1 մլն դրամ՝ ԱՄՆ ապրանքային վարկերի մարմանը, 622.7 մլն դրամ է տրամադրվել Էլեկտրաէներգիայի հաղորդման և բաշխման համակարգի ծրագրի գծով Ճապոնիայի



նկատմամբ պարտքի մարմանը, 24.9 մլն դրամ՝ ԱԷԿ-ի վառելիքի չոր պահպանման համակարգի ծրագրի գծով Ֆրանսիայի նկատմամբ պարտքի մարմանը:

Շուրջ 16.4 մլրդ դրամ միջպետական վարկ է տրամադրվել ԼՂՀ-ին՝ 3.1%-ով գերազանցելով նախորդ տարվա համապատասխան ցուցանիշը: Վրաստանի կողմից Հայաստանի նկատմամբ ունեցած վարկային պարտավորությունների գծով առաջին կիսամյակում ծրագրված 144.9 մլն դրամից 79.9 մլն դրամը վճարվել է հունվար-մայիս ժամանակահատվածում: Բաժնետոմսերի և կապիտալում այլ մասնակցության ձեռքբերմանն ուղղվել է 906.3 մլն դրամ՝ կազմելով կիսամյակային ծրագրի 99.1%-ը և 53.8%-ով գերազանցելով նախորդ տարվա համապատասխան ցուցանիշը: Հաշվետու ժամանակահատվածում 622.3 մլն դրամով ավելացել է արտաքին աղբյուրներից ստացված արտաբյուջետային դրամաշնորհային միջոցների մնացորդը: